



**PRIMA SESSIONE STRASURDINARIA DI U 2022**  
**27 È 28 DI GHJENNAGHJU DI U 2022**  
**1ERE SESSION EXTRAORDINAIRE DE 2022**  
**27 ET 28 JANVIER 2022**

**N° 2022/E1/005**

**Question orale déposée par le Groupe « Core in Fronte »**

**UGHJETTU : Situazioni prufessiunali di l'anziani prighjuneri.**

Prima, salutemu l'ingaghjamentu sputicu di tutti quiddi chi si so sacrificati par a noscia tarra, particularmenti in ssu mesi di ghjinnaghju, in mimoria di Stefanu Cardi, Lisandru Vincenti è Anghjulu Maria Tiberi.

Di luddu 2018, u cullittivu "Patriotti" era ufficialmente ricivutu da a maior parti di i rispunsivuli di l'asicutivu è di l'Assemblea. U so scopu era di spiigà a situazioni di quiddi chi hani pagatu par a libartà di a noscia tarra.

Ramintemu chi, si oghji seti qui, si no semu tutti qui ,hè dinò par via di a so azzioni, e di u so impegnu.

Salutendu l'andatura d'issu cullittivu patrioticu, ci voli dinò à salutà tutti l'altri associ è cumitati chi dapoi anni è anni si battini par fà valè i dritti di tutti i prighjuneri pulitichi.

Spartimu incù voscu a vulintà di falla finita incù 'ssa riprissioni di u Statu francesu è a vulintà d'ingaghjà u presentu è l'avvena in un'andatura appaciata di regulamentu puliticu di a quistioni naziunali corsa.

I prighjuneri è l'anziani prighjuneri pulitichi supportani sempri in a so vita di tutti i ghjorni l cunsequenzi d'issa riprissioni.

Oghji, hè à u niveddu prufessiunali chi punaremu u prublema. Com'è monda semu stati infurmati di i difficoltà scuntrati da quiddi chi circani a stabilizzazioni prufessiunali. Com'è no, cunisciti bè tutti i so difficoltà à tutti i nivedda, .

Ci appughjemu chivi nant'à un asempiu precisu di unu chi ha datu suddisfazioni in un travaddu pruvisoriu in un settori ammaestratu da a noscia culletività è chi dapoi, à malgradu i pricisioni dati, e ancu i prumissi fatti, aspetta sempri un cuntrattu definitivu.

Saria ora di falla finita incù tutti ssi lunghezzi amministrativi è di rispittà a parola data.

Si sà chi uni pochi hani pussutu truvà posti sottu à altri maghjuria par via di u rispettu di u nosciu stintu paisanu. Si devi rinforzà issa logica.

Ùn pudemu accittà ch'iddi ci sghini bluchimi in una stituzioni chi si dici fatta pàr a Corsica. Ùn dumandemu micca favoritismu ma ùn accittemu chi i nosci patriotti si ritruvessini senza nudda quandu ci hè a pussibilità di fà qualcosa.

Vi punimu dunqua i dumandi seguenti :

Tinindu contu di l'ingaghjamenti piddati sott'à l'ultima mandatura, tinindu contu in casi pricisi di i prumissi fatti, pudeti assicurà, par quiddi chi aspettani dighjà, chì i so cartulari sarani prestu studiati e cunsiderati comu ci voli ?

Pudareti prestu prestu metta in ballu unu spaziu di scontri par fà un puntu pricisu d'issa situazioni incù tutti quiddi chi difendini tutti i dritti di i prighjuneri è di l'anziani prighjuneri pulitichi ?